

Perbuatan beri anak hisap vape diselar

## Perbuatan beri anak hisap vape diselar

**KUALA LUMPUR** - Malaysian Vape Industri Advocacy (MVIA) menyelar tindakan sepasang suami isteri yang telah memberikan anak mereka yang dipercayai berusia dua tahun menghisap rokok elektronik atau vape sehingga tular.

Presidennya, Rizani Zakaria berkata, tindakan tidak bertanggungjawab yang dilakukan ibu bapa kanak-kanak tersebut telah menyebabkan masyarakat memandang serong

terhadap penggunaan vape.

Menurutnya, jika perkara seperti ini berterusan ia akan memberikan reputasi buruk kepada penggunaan vape yang akan melumpuhkan industri yang bernilai RM2.27 bilion ini.

“Walhal, hanya sege-lintir yang berkelakuan buruk dan menyalahgunakannya,” kata beliau dalam satu kenyataan pada Rabu.


Justeru katanya,

MVIA sekali lagi menggesa supaya kerajaan segera melaksanakan undang-undang khusus dan mengeluarkan peraturan berkaitan vape dan e-cecair agar perkara seperti itu dapat dibendung.

Sebelum ini tular di media sosial video menunjukkan seorang ibu memuat naik video yang menunjukkan dia memberi anaknya dipercayai berusia dua tahun menghisap rokok elektronik atau vape sehingga mengundang kemarahan netizen.

Dalam perkembangan yang sama, pihak polis telah menahan seorang lelaki yang disyaki memberi anaknya berusia dua tahun menghisap rokok elektronik atau vape pada Selasa.

Ketua Polis Daerah Gombak, Asisten Komisioner Arifai Tarawe berkata, Jabatan Kebajikan Masyarakat (JKM) dan polis telah pergi ke sebuah rumah di Projek Perumahan Rakyat Kampung Baru Air Panas di sini untuk menyelamatkan kanak-kanak tersebut pada jam 4.50 petang.



Aksi seorang kanak-kanak menghisap vape yang diberikan ibu bapa mereka tular di media sosial.